



Kamis, 14 November 2024

Ogen: Job 13:28



“Reh Burukna Reh Dekahna”



Kegeluhen manusia ibaratken bagi dukut, terang kenca wari jenari reh matawari marpari, dukut e meter melus. Si enda ngatakan maka kegeluhen manusia labo ndekah (pemasmur ngatakan, umur manusia sekali erkumesah ngenca = 80 tahun ngenca), dingen gegehna pe erbatas. Kegeluhen manusia lit oratna adina ia tetap erpengarapen dingen erpengendes man Tuhan. Job 13:28 nuratken "*E maka **buruk dagingku** desken kayu si enggo burburen; desken selambar baju si enggo ngetngeten.*" Kalimat enda ngatakan maka manusia erbatas kal kengasupenna, kepentaren dingen gegehna lako engkelini kesahna. I bas kitab Job enda ngatakan daging manusia desken kayu si burburen entah pe baju si ngetngeten, bage me geluh manusia.

'Reh burukna reh dekahna', ningetken kita gelah i bas kerina dampar kegeluhennta dingen i bas pertambahan umurta tetap nggeluh ras Tuhan. Engkai maka perlu kita nggeluh ras Tuhan? Banci saja lit kita la ngasup ngaloken situasi rikut pe ras kondisita adi dagingta nggo reh tuana. Umpamana: sekalak diberu, i bas umurna di atas lima puluh enggo melala si mesuina, kulit pe nggo reh kendorna, ayo pe nggo mulai teridah ringutna dingen buk bas takal pe nggo encidahken rupa-rupa mbentar. Perubahen situasi e, lit piga-piga si la siap ngalokensa, e maka perlu kal tetap enggeluh i bas Tuhan.

Dagingta banci saja reh burukna, turah si mesui bas kulanta i bas umur si lanai nguda tapi perukurenta tetaplah ngandalken Tuhan; daging banci saja reh lemahna tapi perukuren tetap nare kempak keleng ate Tuhan; daging banci saja reh burukna reh dekahna tapi ingetlah umur gedang e me pemere Tuhan kempak geluhta. Nggeluhlah tetap erpengarapen man Tuhan i bas daging kulanta reh tuana, gelah si dat keriahen bage pe kemalemen ate i bas usia si nggo metua.